

**UNDANG-UNDANG KECIL
KEDAI GUNTING RAMBUT
DAN PENDANDAN RAMBUT
MAJLIS DAERAH BESUT
1990**

TR. P.U. 7
BIL. 10/1991
TARIKH 9 SEPTEMBER 1991



NEGERI TERENGGANU DARUL IMAN

Warta Kerajaan

DITERBITKAN DENGAN KUASA

GOVERNMENT OF TERENGGANU DARUL IMAN GAZETTE

PUBLISHED BY AUTHORITY

Jil. 44
Bil. 10

9hb Mei 1991

TAMBAHAN No. 5
PERUNDANGAN

Tr. P.U. 7.

AKTA KERAJAAN TEMPATAN 1976

UNDANG-UNDANG KECIL KEDAI GUNTING RAMBUT DAN PENDANDAN RAMBUT (MAJLIS DAERAH BESUT) 1990

PADA menjalankan kuasa-kuasa yang diberi oleh seksyen 102 Akta Kerajaan Tempatan 1976, Majlis Daerah Besut membuat, dan menurut seksyen 103 Akta tersebut pihak Berkuasa Negeri mengesahkan, undang-undang kecil berikut:

1. Undang-undang kecil ini bolehlah dinamakan **Undang-Undang Kecil Kedai Gunting Rambut dan Pendandan Rambut (Majlis Daerah Besut) 1990** dan hendaklah dipakai hanya bagi kawasan Majlis Daerah Besut dan hendaklah mula berkuatkuasa pada tarikh ia disiarkan dalam *Warta*. Akta 171.
Nama, pemakaian dan mula berkuatkuasa.
2. Dalam undang-undang kecil ini, melainkan jika kandungan ayatnya menghendaki makna yang lain:— Tafsiran.

“dandan rambut” termasuk potong rambut, kerinting rambut, potong-kemas, mencelup, mencukur, menyampu dan tiap-tiap kerja seumpama itu yang biasanya dilakukan oleh seseorang pendandan rambut sama dan dengan tangan, dengan alat, dengan menggunakan elektrik atau apa-apa serbuk atau larutan atau dengan apa-apa kombinasi cara-cara tersebut;

“kedai gunting rambut” termasuk sesuatu kedai pendandan rambut dan tiap-tiap salun dan semua premis yang di dalam atau di atasnya urusan dandanan rambut dijalankan;

"larutan disinfektan" ertinya larutan apa-apa disinfektan yang sama kekuatan racun kumannya dengan 5 peratus larutan asid karbolik;

"pendandan rambut" termasuk seorang penggunting rambut dan (semasa orang itu menjalankan kerja berkaitan dengan dandan rambut dalam kedai gunting rambut) seorang pekerja pendandan rambut;

"Yang Dipertua" ertinya Yang Dipertua Majlis Daerah Besut dan termasuklah Timbalan Yang Dipertua.

Lesen, bayaran dan pemeriksaan.

3. (1) Tiada suatu pun premis boleh digunakan sebagai kedai gunting rambut melainkan jika premis itu dilesen oleh Yang Dipertua.

(2) Semua lesen, melainkan jika digantung atau dibatalkan terlebih awal, adalah sah sehingga 31hb Disember berikutan dari tarikh bermulanya lesen itu, tetapi boleh dibaharui pada atau sebelum 31hb Disember tiap-tiap tahun.

(3) Tiap-tiap orang yang berkehendakkan lesen atau pembaharuan lesen hendaklah membuat permohonan bertulis kepada Yang Dipertua.

(4) Bayaran yang kena dibayar bagi suatu lesen hendaklah menurut skala seperti yang dinyatakan dalam Jadual.

(5) Yang Dipertua hendaklah menyimpan suatu daftar semua permohonan untuk mendapat lesen atau membaharui lesen.

(6) Dalam masa sesuatu lesen itu hidup, Yang Dipertua boleh, atas permohonan pemegang lesen itu, membenarkan supaya lesen itu dipindahmilik kepada seorang lain.

(7) Tiap Pendandan rambut yang menjalankan perniagaan atau urusan pendandan rambut atau menjaga atau diambil bekerja di premis di mana urusan itu dijalankan hendaklah membenarkan Yang Dipertua atau mana-mana orang yang diberi kuasa dengan sewajarnya olehnya memasuki premis itu pada bila-bila masa yang menasabah tanpa notis dan tidak boleh menghalang atau membenarkan orang itu dihalang daripada membuat pemeriksaan itu.

Kebersihan premis dan perkakas.

4. Premis tiap-tiap kedai gunting rambut, perkakas, perabut dan alatnya hendaklah pada setiap masa disenggara dalam keadaan baik dan berada di dalam keadaan yang sungguh bersih.

Bekalan air panas dan sejuk.

5. Bekalan air panas dan sejuk yang cukup hendaklah diadakan terus-menerus di tiap-tiap kedai gunting rambut semasa dibuka untuk perniagaan.

Bekas bagi tuala kotor dan buangan tred.

6. Tiap-tiap kedai gunting rambut hendaklah mengadakan sekurang-kurangnya dua bekas yang sesuai yang bertudung rapat, yang ke dalam satu daripadanya hendaklah dimasukkan semua tuala-tuala kotor dan kain-kain lain selepas sahaja digunakan dan ke dalam yang satu lagi hendaklah dimasukkan semua keratan rambut dan lain-lain buangan tred dengan seberapa segera yang praktik selepas melayan seorang pelanggan.

7. (1) Sebelum melayan seseorang pelanggan, tiap-tiap pendandan rambut hendaklah mencuci tangannya dengan teliti dengan menggunakan sabun dan air yang bersih dan, jika perlu, menggunakan berus kuku.

Kehendak kebersihan yang mesti dipatuhi oleh pendandan rambut.

(2) Semasa melayan seseorang pelanggan, tiap-tiap pendandan rambut hendaklah memakai kot atau overall yang bersih dan padan berwarna putih atau warna cerah diperbuat dari kain yang boleh dibasuh.

(3) Tiap-tiap pendandan rambut hendaklah menjaiani pemeriksaan doktor setahun sekali.

8. (1) Tuala muka, pelindung leher, tuala leher dan fabrik-fabrik lain yang secara langsung menyentuh kulit seseorang pelanggan yang disediakan bagi pelanggan hendaklah segar dan bersih.

Tuala muka dan fabrik-fabrik lain.

(2) Tuala muka hendaklah direndam dalam air mendidih atau diwap selama sekurang-kurangnya 5 minit dan kemudian dibasuh sebelum digunakan pada tiap-tiap pelanggan.

9. Tiada apa-apa sabun selain daripada sabun cecair atau krim cukuran atau serbuk cukuran boleh digunakan bagi maksud membuat buih bagi mana-mana pelanggan yang menghendaki cukuran.

Sabun untuk cukuran.

10. Cawan yang digunakan untuk mengisi air bagi membuat buih untuk cukuran hendaklah dikosongkan selepas sahaja digunakan bagi tiap-tiap pelanggan dan dicuci sepenuhnya dengan air mendidih.

Cawan cukuran.

11. Span atau puff bedak tidak boleh digunakan ke atas pelanggan.

Span tidak boleh digunakan.

12. Pendarahan hendaklah diberhentikan hanya dengan suatu stiptik yang sesuai yang hendaklah digunakan ke atas seorang pelanggan sahaja dan hendaklah selepas sahaja digunakan dimasukkan dalam bekas yang disediakan untuk buangan tred.

Memberhentikan keluar darah.

13. (1) Mana-mana orang yang mengidap apa-apa penyakit berjangkit atau menular atau apa-apa ruam atau letusan berjangkit atau menular dimuka, leher atau kulit kepala, hendaklah memberitahu pendandan rambut tentang adanya penyakit, ruam atau letusan itu sebelum ia menawarkan kerja mendandan rambut dijalankan ke atas dirinya.

Penyakit-penyakit berjangkit atau menular.

(2) Tiap-tiap pendandan rambut, apabila diberitahu sedemikian atau apabila mendapat tahu secara lain bahawa seseorang itu mengidap apa-apa penyakit berjangkit atau menular atau ruam atau letusan berjangkit atau menular hendaklah, semasa melayan orang itu, menggunakan alat-alat berasingan yang diasingkan untuk digunakan khas bagi orang-orang itu. Alat-alat itu hendaklah selepas sahaja digunakan direndam dalam suatu larutan disinfektan selama sekurang-kurangnya lima minit. Semua tuala, kain atau fabrik lain yang digunakan ke atas orang itu atau kot atau overall yang dipakai oleh pendandan rambut itu hendaklah selepas sahaja digunakan dimasukkan dalam suatu larutan disinfektan atau dalam air mendidih selama sekurang-kurangnya sepuluh minit.

(3) Seseorang pendandan rambut yang mengidap apa-apa penyakit berjangkit atau menular atau apa-apa ruam atau letusan kulit berjangkit atau menular tidak boleh melayan mana-mana pelanggan.

Membasmikan kuman dari alat-alat.

14. (1) Tiap-tiap pendandan rambut hendaklah menyebabkan supaya semua kelengkapan bagi kegunaan am yang tersebut di bawah ini dibasmikan kuman mengikut cara yang ditetapkan atau cara pembasmian kuman melalui diangan lampu ungu yang diluluskan oleh Yang Dipertua.

- (a) pisau cukur, gunting dan sikat dengan merendamkan selama sekurang-kurangnya tiga minit dalam larutan-larutan disinfektan;
- (b) perepang (clipper) dengan terlebih dahulu memberus sepenuhnya gigi-gigi dengan suatu berus yang bersih dari kuman untuk membuat semua rambut dan kemudian menglap gigi-gigi itu dengan sekeping kain yang telah dicelup dalam larutan disinfektan;
- (c) berus rambut dengan merendamkan bahagian bulu atau bulu keras selama sekurang-kurangnya tiga minit dalam larutan disinfektan yang sesuai dan kemudian mengeringkan berus itu dalam ruang udara-panas;
- (d) berus cukur apabila suatu berus baru mula digunakan, rendamkan bahagian bulu keras dalam larutan formalin 10 peratus selama sekurang-kurangnya tiga puluh minit dan selepas itu bilas dalam air bersih. Apabila hendak digunakan lagi kemudiannya rendamkan bahagian bulu atau bulu keras dalam air mendidih selama sekurang-kurangnya tiga minit kecuali jika bulu keras itu dibuat daripada apa-apa sintetik memadai dengan membasuhinya dengan sabun dan air.

(2) Semua kelengkapan yang tersebut dalam perenggan (1) hendaklah dibasmikan kuman mengikut cara yang dinyatakan dalam perenggan itu sebelum digunakan ke atas tiap-tiap pelanggan.

Meludah.

15. Tiada seorang pun boleh meludah ke lantai atau dinding kedai gunting rambut.

Binatang di larang masuk.

16. Tiada seorang pun pendandan rambut boleh menyebabkan atau membenarkan apa-apa binatang masuk atau tinggal dalam kedai gunting rambut.

Salinan undang-undang kecil hendaklah dipamerkan dalam kedai gunting rambut.

17. Suatu salinan undang-undang kecil ini, yang diletakkan dalam frame yang sesuai, hendaklah pada setiap masa dipamerkan dengan cara yang mudah dilihat dalam tiap-tiap kedai gunting rambut dan hendaklah sentiasa dijaga dalam keadaan bersih, boleh dilihat dan boleh dibaca.

Penalti.

18. Mana-mana orang yang melanggar mana-mana peruntukan di dalam undang-undang kecil ini atau apa-apa syarat yang dikenakan ke atas lesen adalah melakukan suatu kesalahan dan apabila disabitkan boleh didenda tidak lebih daripada dua ribu ringgit atau penjara selama tempoh tidak lebih daripada satu tahun atau denda dan penjara itu kedua-duanya.

19. Seksyen 150 hingga seksyen 152 peraturan-peraturan Kedai ^{Pembatalan}
Gunting di bawah Undang-undang Kecil Bandaran Bil. 12 tahun
1355, Terengganu adalah dimansuhkan.

JADUAL

<i>Bayaran lesen bagi setahun</i>	<i>Bayaran lesen</i>
(a) Tidak melebihi 3 kerusi penggunting rambut.	\$ 10.00
(b) Melebihi 3 kerusi penggunting rambut tetapi tidak melebihi 8 kerusi penggunting rambut.	\$ 25.00
(c) Melebihi 8 kerusi penggunting rambut tetapi tidak melebihi 15 kerusi penggunting rambut.	\$ 50.00
(d) Melebihi 15 kerusi penggunting rambut tetapi tidak melebihi 20 kerusi penggunting rambut.	\$ 70.00
(e) Melebihi 20 kerusi penggunting rambut	\$ 100.00

Diperbuat oleh Majlis Daerah Besut dalam Mesyuarat pada
31hb Mac, 1990.

[MDB. 027/SJ.10]

ABDULLAH BIN MUHAMAD,
Yang Dipertua,
Majlis Daerah Besut

Disahkan oleh Pihak Berkuasa Negeri di dalam mesyuarat pada
28 Januari 1991.

[SUK. TR. 1200/355/5; PUN. TR. (S) 85/3/5]

OSMAN BIN MUDA,
Setiausaha,
Majlis Mesyuarat Kerajaan Negeri,
Terengganu